

Inatsisartut suleriaasianni § 33 naapertorlugu aalajangiiffigisassatut siunnersuut ataani pineqartoq matumuuna Naalakkersuisunit saqqummiunneqarpoq:

Kalaallit Nunaanni pinerluttulerineq pillugu inatsisip aamma Kalaallit Kalaallit Nunaanni eqqartuussisarneq pillugu inatsisip allanngortinneqarnissaanut missingiummut Namminersorlutik Oqartussat tapersersuinissaat pillugu Inatsisartut aalajangiiffigisassaattut siunnersuut (Oqarasuaatikkut nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuineq, kiisalu palleeqqusinnginneq, sumiiffimmeeqqusinnginneq peersitaanerlu il. il.) aamma palleeqqusinnginneq, sumiiffimmeeqqusinnginneq peersitaanerlu pillugit inatsisip Kalaallit Nunaannut atuutilernissaa pillugu peqqussut aamma pinerlunnernik eqqugaasimasunut naalagaaffimmit taartisiaqarnissaq pillugu inatsisip allanngortinneqarnera.

Ilaqutariinnermut, Naligiissitaanermut, Isumaginninnermut Inatsisinillu atuutsitsinnermut Naalakkersuisoq

Tunngavilersuut

Aalajangiiffigisassatut siunnersuummi pineqarpoq peqqussutissatut missingiummut inatsisissatullu siunnersuummut Namminersorlutik Oqartussat oqaaseqaataat. Inatsisissatut siunnersuut peqqussutissatullu missingiut allannguutissanut makkununga aallaaviupput:

- Palleeqqusinnginneq, sumiiffimmeeqqusinnginneq peersitaanerlu
- Oqarasuaatikkut nalunaaruteqartarneq
- Kalaallit nunaanni pinerluuteqarsimasunut inissiisarfinni pissaanermik atuineq

Palleeqqusinnginneq, sumiiffimmeeqqusinnginneq peersitaanerlu

Peqqussutissatut missingiummi siunertaavoq palleeqqusinnginneq, sumiiffimmeeqqusinnginneq peersitaanerlu pillugit inatsisip kunngip peqqussutaatigut atuutsilernissaa. Inatsimmi siunertarineqarpoq inuit eqqissimatitaasinnaanannit innarlerneqannginnissaat, malersugaannginnissaat, ajortisaarineq, ajuutiginnilluni malersuineramik taaneqartartoq ilanngullugu pillugit illersugaanissaannut suliniut nukittorsassallugu.

Politimesteri peqqussutissatut missingiummi periarfissinneqarpoq aalajangiivigissallugu inuk inummut allamut orniguteqqusaajunnaassasoq, attaveqaqusaajunnaassasoq imaluunniit malittarinnissinnaajunnaassasoq.

Aammattaaq politimesteri periarfissinneqarpoq aalajangiivigissallugu sumiiffimmi erseqqinnerusumik killilikkami inuk najuutissanngitsoq, soorluttaaq aalajangiivigineqarsinnaasoq 18 sinnerlugit ukiulik angerlarsimaffimmineeqqusaassanngitsoq.

Aammattaaq eqqartuussiveqarneq pillugu inatsisip aamma pinerluttulerineq pillugu inatsisip allannguutissaannik missingiummi siunnersuutigineqarpoq tigusarinnittarneq, najugaqataasinnaannginneq aamma anisitsisarneq pillugu inatsisip atuutilersinneqarnissaanut atatillugu naleqqussarneqassasoq.

Oqarasuaatikkut nalunaaruteqartarneq

Inatsisissatut siunnersuummi anguniarneqarpoq, oqarasuaatikkut nalunaaruteqartarneq Kalaallit Nunaanni eqqartuussisarneq pillugu inatsimmi nalunaaruteqariaatsitut nutaatut atulersinneqassasoq. Oqarasuaatikkut nalunaarutiginnissinnaalernissap atuutilersinnissaata saniatigut inatsisissatut siunnersuutissatut missingiummi ilaatigut aalajangersarneqassasut oqarasuaatikkut nalunaarutiginnitarnissap atorineqarnissaani periaasissat aamma kina oqarasuaatikkut nalunaaruteqarsinnaassassanersoq pillugu.

Inatsiseqarnermut ministeriaqarfik Naalakkersuisullu isumaqarput, oqarasuaatikkut nalunaaruteqartarneq eqqartuussivinni suliassamik isumaginninnerup patajaallisarneranut ilapittuutaassasoq. Kalaallit Nunaanni oqarasuaatikkut nalunaarutiginnittarnernut malittarisassat atuutsinneqalernissaannut siunnersuut Kalaallit Nunaanni Eqqartuussiviit aamma Kalaallit Nunaanni Politimesterip tapersorsorpaat.

Kalaallit nunaanni pinerluuteqarsimasunut inissiisarfinni pissaanermik atuneq

Pinerluttulerineq pillugu inatsimmi § 222, imm. 1 malillugu, isertitsivimmi sulisut inissinneqarsimasumut pissaanermik atuisinnaapput persuttagaanissamik ulorianartoqalersinnaanera pinngitsoortinniarlugu imaluunniit imminut toqunnissaq allatulluunniit imminut ajoqusernissaq pinngitsoortinniarlugu sakkortoorujussuarmik akiuunneq anigorniarlugu, qimaanissaq pinngitsoortinniarlugu qimaanerluunniit unitsinniarlugu imaluunniit iliuusereqqussaasoq

piviusunnngortikkumallugu taamaaliornissaq pigasuartumik pisariaqartillugu aamma tamanna pillugu sulisut peqqusinerat tigummisaasup malinnngippagu malikkumannngippaguluunniit

Pissaanermik atuineq pinerluttulerineq pillugu inatsimmi § 222, imm. 2. naapertorlugu pisinnaavoq tigusinikkut, ajatsinikkut aamma anaartaanikkut.

Kalaallit Nunaanni Eqqartuussiveqarneq pillugu Siunnersuisoqatigiit innersuussutigisimavaat Kalaallit Nunaanni isertitsivinni sulisut aamma periarfissinneqassasut qasilitsumik seqqittaatit eqqornaveeqqutillugu tigummisanut atornissaannut.

Tamanna tunngavigalugu inatsisissatut siunnersuutissatut missingiummi siunnersuutigineqarpoq pinerluttulerineq pillugu inatsimmi § 222, imm. 2-mi tamatumunnga inatsisitigut tunngavissiisoqassasoq.

Aammattaaq inatsisissatut siunnersuutissatut missingiummi siunnersuutigineqarpoq pinerluttulerineq pillugu inatsimmi § 222, imm. 2-mi pissaanermik atueriaaseq ajatsineq peerneqassasoq. Allannguut taanna aqutsinikkut allannguutigitinneqareerpoq taamaalillunilu tamanna inatsisissatut siunnersuummi kinguneqartinneqarluni.

Aningaasaqarnikkut allaffissornikkullu pisortanut kingunissai

Soqanngilaq.

Aningaasaqarnikkut allaffissornikkullu namminerisamik inuussutissarsiutilinnut kingunerisassat

Soqanngilaq.

Innuttaasunut aningaasaqarnikkut sunniutissat:

Soqanngilaq.

Tusarniaaneq

Inatsiseqarnermut ministeeriaqarfik naalagaaffiup oqartussaasuinut danskillu kattuffiinut tusarniaanermik ingerlatsisuuvoq. Ilaqutariinnermut, Naligiissitaanermut, Isumaginninnermut

Inatsisinillu Atuutsitsinermut Naalakkersuisoqarfik kalaallit kattuffiit tusarniaanermik ingerlatsisuuvoq.

Peqqussutissatut missingiut inatsisissatullu siunnersuut tapersorsorneqarput, kisiannili kattuffiit arlallit oqaatigaat, pissaanermik atuneq taamaallaat ajornartoorfimmi atorneqartassasoq.

Ilanngussaq

1. Oqarasuaatikkut nalunaaruteqartarneq pillugu inatsisissatut siunnersuutip eqikkaarneqarnera
2. Pissaanermik atuneq pillugu inatsisissatut siunnersuutip eqikkaarneqarnera
3. Oqarasuaatikkut nalunaaruteqartarneq, kalaallit nunaanni pinerluuteqarsimasunut inissiisarfinni pissaanermik atuneq, kiisalu palleeqqusinnginneq, sumiiffimmeeqqusinnginneq peersitaanerlu pillugit inatsisissatut siunnersuut.
4. Palleeqqusinnginneq, sumiiffimmeeqqusinnginneq peersitaanerlu pillugit eqikkaaneq
5. Palleeqqusinnginneq, sumiiffimmeeqqusinnginneq peersitaanerlu pillugit peqqussutissamut missingiut
6. Tusarniaanermut nulunaarsuutini oqaasqarfiginerqarput

